

TOLOSAKO UDALA

2018 AZA. 28

SARRERA - ERREGISTROA

ZKA. 9269

Idazlaritzak
Kepia' Nola
ehbildu
Tolosa

Orixeko institutuaren eraikuntza ahalik eta azkarren hasteko eskatzeko mozioa

Tolosako Orixeko institutuaren eraikinak bertan eskolak emateko baldintza minimoak ez dituela betetzen gauza jakina da. Eraikin berri bat beharrezkoa da eta horrela jasotzen da Eusko Jaurlaritzaren Hezkuntza sailaren 2014-2018 inbertsio-planean.

Eraikin berria oraingoa dagoen tokian bertan egingo da. Hortaz, eraikuntza-fasean zehar ezingo da bertan eskolarik eman. Epe horretan, eskolak emateko behin-behineko azpiegiturak prestatuko dira: DBHko ikasleek Gorosabel eraikinean eta ondoan kokatuko diren modulu aurrefabrikatueta jasoko dituzte eskolak eta batxilergokoek Paper Eskolan eta ondoan kokatuko diren modulu aurrefabrikatueta.

Bestetik, 2016ko ekainaren 28ko osoko bilkurak Eusko Jaurlaritzaren Hezkuntza sailari eskakizun hau egin zion:

"Udalak, udalaren eskumen-esparruaren baitan dauden urrats eta eginkizun guztietan, bere esku dagoen guztia egingo du Orixeko institutuko eraikin berriaren proiektua errealitate bihurtu dadin ahalik eta lasterren.

2- Udalak Eusko Jaurlaritzako Hezkuntza, Hizkuntza Politika eta Kultura sailari eskatzen dio egutegi zehatza egin dezala, non egin beharreko urrats guztiei klarki egikaritze-data ipintzen zaien, Orixeko BHI institutuko eraikin berria obra 2018an zehar hasi dadin beranduen. Halaber, eskatzen dio egutegia 2016ko uztailaren 31rako egina egon dadin eta Orixeko Institutuko eta udaleko ardura dunei helaraz diezaien."

Egun agerikoa da eraikinaren eraikuntza ez dela 2018an hasiko. Alabaina, ahalik eta azkarren hasteko komeni da, oraingo eraikinaren egoera egunetik egunera okerragora doalako. Orixeko hezkuntza-komunitatearen nahikundea da 2019-20 ikasturtearen hasieran eskolak behin-behineko instalazioetan ematen hasteko eta eraikin berriaren eraikuntza 2019ko udazkenean abiatzea.

Nahikunde hori bete ahal izateko bi lanak lehiaketa publikora atera behar ditu Eusko Jaurlaritzaren dagokion organoak. Ez litzateke bidezkoa izango lehiaketa-prozedura luzatzearen ondorioz Orixeko institutuko ikasleek 2019-2020 ikasturtea oraingo erakinean egin behar izatea.

Hori guztia aintzat hartuta Tolosako udalak Eusko Jaurlaritzaren Hezkuntza sailari eskatzen dio:

Orixeko institutuko behin-behineko instalazioak prestatzeko eta eraikin berria eraikitzeko kontratazio-prozedurak ahal den bezainbat azkar ditzala, ikasleek 2019-20 ikasturteko eskolak behin-behineko instalazioetan hasi ahal izan dezaten.

Tolosan, 2018ko Azaroaren 28an

Kristina Pelaez Errazkin



TOLOSAKO
UDALA

2018KO EUSKARAREN NAZIOARTEKO EGUNERA KO ADIERAZPENA

BIZI. PREST

Egunero delako euskararen aldia

Bizi. Prest.

Halaxe datorkigu euskara bere aurtengo Nazioarteko Egunean.

Eta halaxe doa etorkizunerantz. Mingainetan, pantailetan, uhinetan bizi-bizi. Zernahitarako prest.

Etxean bizi-bizi, kalean bezala; bizi-bizi eskolako jolastokian, ikasgelan bezala; lantokian bizi-bizi, lagunarteko solasaldietan bezala; bizi-bizi osagilearenean, saltokian bezala; zuzeneko harremanetan bizi-bizi, birtualetan bezala; bizi-bizi kirolean, liburuetan edo zineman bezala.

Prest gaudelako gu, euskal herritar gehien-gehienok, hori horrela izan dadin. Prest gaudelako euskarari gure hitzen hegoak eskaintzeko, ahotik belarrira, bihotzetik bihotzera, burutik burura hegaldada dadin, samur bezain indartsu. Dakiguna dakigula, mintzatzen ez dena baita euskara eskas bakarra.

Prest gaude, eta gogotsu, euskarak gure ahoan bizi-bizi dantza egin dezan. Gogotsu gaude, eta prest, gure belarrietan atseginez onartzeko euskararen soinua. Dakiguna dakigula, entzuten ez dena baita euskara kaskar bakarra.

Prest gaudelako, eta ezin gogotsuago, euskaraz ere gero eta gehiago bizitzeko. Ingurune guztietan. Eginkizun orotan.

Natural-natural. Bizi-bizi.

Euskal hiztunok horretarako egin behar dugun urratsa ez da txikia, ez erraza. Borondate aktiboa eskatzen digu. Erosokeriari izkin egitea eskatzen digu. Sakon errotoetako ohiturak aldatzea eskatzen digu. Kontzientzia ahalegin sendoa eskatzen digu.

Euskaraz ere herritar izateko aukera egitea eskatzen digu.

Eta eskatzen digu, batez ere, euskaldun izatetik euskaldun bizitzera doan tartea gainditzeko jokaera aktiboa. Eta etengabea.

Euskararen erabileran egin beharreko urrats erabakigarri hau zinez da gizarte-eraldaketa zabal sakona, neurri historikoa duena, gure gizartearen bilakabidean mugarri izango dena.

Eta, neurri horretako aldaketa guztien antzera, adostasuna du elikagai nagusi, prestasun eta prestutasunarekin batera.

EUSKARAREN GIZARTEA. GIZARTEAREN EUSKARA

Adostasuna eta batasuna dira, beraz, bidea, euskarak batura behar duelako, ez kenketa; biderketa behar du, ez zatiketa. Herri aginteak, gizarteak bere dinamika propiotik sorturiko erakundeak, herritar guztiok eta gutariko bakoitza: den-denok gara, aldi berean, euskararen erabilera eraginkortasunez areagotzeak ezinbestekoa duen adostasun zibil zabalaren osagai eta eragile, aldi berean garen bezala haren onuradun eta bultzatzaile, bideratzaile eta babesle.



TOLOSAKO
UDALA

Baina aktibotasuna, praktikotasuna, da adostasun horren osagarri nahitaezkoa. Izan ere, honezkero, ez da aski aldarrikapen hutsetan galtzea. Atzean utzi behar dugu beste inork euskararen alde egin lezakeenaren zain egotea. Lorgarria delako, erabat, euskararen erabilera hazkunde iraunkorraren bidean jartzea, baldin eta herritar bakoitzak euskara ezpainetara eramateko bere erabaki pertsonala gauzatzen badu eta erakunde publiko bakoitzak herritarrek euskaraz aritzeko duten eskubidea bermatzeko bitartekoak jartzen baditu, hori eta ez besterik delako, azken finean, gizartearen helburu kolektiboa: aukera pertsonal ugariaren eta erakunde publikoen betebeharraren batura.

Eta egin egingo dugu.

Munduari euskaraz ere helduz, euskararentzat belarria zein gogoa prest izanez, euskara ahoz zein idatziz bizi-bizi eskainiz.

Euskarak eguneroko bizitza aberastu dezan; eguneroko bizitzak euskara bete dezan.

Elkarrekin.

Elkarrenganako errespetu osoz, elkarrengandik adorea jasoz.

Elkarri euskara eskainiz.

Euskara bizi-indarrez sendoagotuz.

Bizi. Prest.

Egunero delako euskararen aldia.

EGUNERO DELAKO EUSKARAREN ALDIA



TOLOSAKO
UDALA

AZAROAREN 25eko MOZIOA

EMAKUMEENGANAKO INDARKERIAREN KONTRAKO NAZIOARTEKO EGUNA

Azaroaren 25a Emakumeenganako indarkeriaren kontrako Nazioarteko Eguna dela-eta, Tolosako Udalak bere egiten du hiria, indarkeria matxistarik gabeko gune gisa eraikitzeko ardura eta lehentasunezko konpromiso politikoa berresten du indarkeria mota horren adierazpen guztien kontrako lan irmoa. Azkeneko urteetan, zoritxarrez, Euskal Herrian indarkeria matxistak gora egiten jarraitzen du. Ezin dugu ahaztu indarkeria honen adierazpen gehienek, egunero gertatzen direnak, gizartean normalizaturik daudela.

Hedabideak, publizitatea, telebista, hezkuntza eredua, emakumeen errepresentazio falta, emakumeak menderatzen dituzten genero estereotipo eta rolak, sinesmenak, praktikak eta jarrerak, besteak beste, injustuak eta emakumeak gutxiesten dituen ordena sozialaren parte dira.

Testuinguru honetan, arreta jarri nahi dugu indarkeria matxistaren biktimek duten erreparazio-eskubidean. Erreparazio horrek egiarako eskubidea dakar; alegia, bizi izandako indarkeriaren, salaketaren eta emakumeen hitzen kontaketa egiazki entzuna izatea. Horren guztiaren xedea da hautsitako eskubideak lehengoratzeari eta pairatutako indarkeriaren inpaktuak sozialki aitortzea. Indarkeria matxista hauek bizi dituzten emakumeen kontaketak zalantzan jartzen direnean, haien hitza gutxietsia izaten da, zikindua, are gehiago, isilarazia. Halakoetan biktimizazio bikoitza gertatzen da: emakume biktimek jasandako minari lotsa eta erruduntasuna eransten zaizkie; bestaldetik, justifikatu egiten dira erasotzaileak.

Beraz, Tokiko Erakundeetatik gure egin behar dugu gizarte bat eraikitzean daukagun ardura sozial eta politikoa, gizarte horrek biktimen egiarako eskubidea bermatuko badu. Hori dela eta, Tolosako Udalak indarkeria matxistaren aurrean udal erantzunaren artikulazioa lantzen jarraituko du eta ahal duen heinean, Istanbulleko Hitzarmenaren markoa egokitu eta biktimen erreparaziorako toki-praktikak garatuko ditu.



TOLOSAKO
UDALA

Horregatik, Tolosako Udalbatzak bere jarrera berresten du, emakumeei indarkeria matxistatik gabe bizitzeko duten eskubidea berma dakien, eta konpromiso zehatz hauek hartzen ditu:

- 1.- Indarkeria matxistak ondorioz, emakume kaltetuarekiko erreparazio-eskubidearen aitortza eta horri buruzko prozesuetan emakumeei eta bere inguruko guztiei laguntza ematea, emakumeek adierazitako testigantza eta beharrak egiaztatzeke, eta indarkeria matxista ez errepikatzeko bermea izatea, guztiz osatu daitezen eta indarkeriarik gabeko bizitza-eskubidea gauzatu ahal izan dezaten.
- 2.- Emakumeenganako Indarkeriaren kontrako I. Udal Protokoloaren zerbitzuak hobetzen lagundu: protokolo beraren ebaluaketa egin eta erakundeen arteko lankidetzak, koordinazioa, eta emakumeei eta beren familiei arreta osoa hobetzeko eta babesik handiena eskaintzeko, ahalduntze feminista eta banakako erreparazioak ikuspegi nagusi bezala harturik.
- 3.- Tolosako Udalak, emakumeentzat ahalbideratuko duen etxean bertan, besteak beste, emakumeentzako jabekuntza jarduerak, hainbat formazio eta zerbitzuen eskaintzak gehitu eta hobetzeko asmoz jarraituko du. Ildo horretan, indarkeria matxista jasan duten emakumeen erreparazio eta aitortza banakakoa nahiz kolektiboa lantzeko programa iraunkorrek antolatuko ditu, beti ere hauek hobetzeko asmoz, besteren artean memoria historikoa berreskuratzea, omenaldi-ekitaldiak, memoria eta kontaketa jakinarazteko jardunaldiak, gazteekiko sentsibilizazio tailerrak, eta abar.
- 4.- Ikastetxeekin batera indartzen jarraitzea, batetik, Hezkidetzak proiektua eta Mahaia, eta, bestetik, Beldur Barik eta Hi haiz, hi! programak, zeinetan agresio-mota guztiak saihesteko helburuaz, hauek sustatzen baitira: berdintasunean oinarritutako sexualitatea, nesken jabekuntza eta mutilen papera berdintasunezko harremanen alde.
- 5.- Elkarlanean, mugimendu feministarekin, adituekin eta indarkeria matxistatik irteerako emakume kolektibo eta elkarteekin sare bat eginez jardun.

6.- Tolosako Udalak bat egiten du Azaroak 25 egunak adierazten duenaren harira, Tolosako Talde feministarekin batera antolatuko diren ekitaldiekin, eta jendarte osoari ere dei egiten dio ekitaldi horietan parte har dezan.


Tolosan, 2018ko azaroaren 20an



JOKIN AZKUE ARRASTOA
EAJ-PNV



CRISTIAN FERNANDEZ SUSIN
PSE-EE



KRISTINA PELAEZ ERRAZKIN
EH BILDU

